

Date – 11/05/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

- Nikum April atanga kumin March thla inkar chhung khan Mizoram Police leh excise & narcotics department hnathawkte chuan heroin kg. 112 leh gram 873 zet an man.
- Mizoram leh Bangladesh ramri lamah venhimna khauh zawka kalpui a ni.
- ‘Nute Ni’ (Mothers’ Day) chu vawiin khan khawvel hmun dangte rualin Mizoramah Chhandamna Sipai Pawl chuan he ni pual hian hun an hmang.
- Prime Minister Narendra Modi-a hovin New Delhi-a a chenna in-ah mi pawimawhte an thukhawm.

<><><>

DRUG SEIZURE

Tangka kum kal ta, nikum April atanga kumin March thla inkar chhung khan Mizoram Police leh excise & narcotics department hnathawkte chuan heroin kg. 112 leh gram 873 zet an man.

Nikum tangka kum chhunga Police leh excise & narcotics department-in heroin an man hi cheng vaibelchhe 33 leh nuai 86 hu zet a ni a. Police hi kg 73 leh gram 457 manin excise & narcotics hian kg. 39 leh gram 416 an man a ni. Hemi hun chhung vek hian department pahniha thawkte hian methamphetamine kg 924 leh gram 825 manin a hlut zawng hi cheng vaibelchhe 120 leh nuai 23 hu a chhut a ni a. Police hian crystal meth (a mum a siam ni lo) kg. 29 leh gram 939 an man a, cheng vaibelchhe 89 leh nuai 82 zet hu a chhut a ni a, police vek hian caffeine kg 4,075 manin a hlut zawng hi cheng nuai 61 chuang hu a chhut a ni. Hemi hun chhung hian excise & narcotics hnathawkte hian crystal meth leh caffeine man an nei ve lo thung. Heroin, methamphetamine, crystal meth leh caffeine an mante hi belhkhawmin cheng vaibelchhe 244 leh nuai 52 chuang hu zet a ni. Hemi hun chhung vek hian department pahnihte hian Ganja kg 503 leh gram 52 bakah opium gram 945 an man

bawk a. Chu bakah Mizo thalai tam takin an hmansual nitrazepam, alprazolam, codeine telna khuh damdawi leh tramadol thahnem tak an man bawk a ni.

Ruihhlo dona dan khauh tak Narcotic Drugs & Psychotropic Substances Act, 1985 hmangin Police department-in thubuai 316 ziaklutin mi 428 an man a, an zinga 77-te hi ramdangmi (foreigner) an ni. He dan hmang tho hian excise & narcotics department chuan thubuai 532 ziaklutin mi 783 an man a, an man zinga 55-te hi ramdangmi an ni.

<><><>

KMMTT

Chief Minister hlui, MNF President ni bawk Pu Zoramthanga chuan Myanmar a Akyab lawng chawlhmun panna siam hna chu central sorkarin a ngai pawimawh thar hle a ni, a ti.

Pu Zoramthanga hian Inrinni khan Kaladan Multi-modal transit transport kawngpui, Zorinpui leh Myanmar ram chung engemaw chena thui tlawhin he kawng dinhmun hi a hmunah kalin a enfiah a. Pu Zoramthanga hi Pu R Rohmingliana MLA leh MNF hotu thahnem takin an tawiawm a ni. Chief Minister hlui chuan, Bangladesh hotute thusawi avang leh khawvel inher zelin a ken tel avangin he lai kawngpui hi tun hma aiin a let tam takin central sorkar hian a ngai pawimawh tawh niin a sawi a. He kawngpui hi Mizo mipui tan malsawmna nasa zawk thlentu a nih thuai a beisei thu a sawi. Bangladesh sorkar a inthlak a, Muslim firfiakin ro an rel ni a sawiin Bangladesh thuneitu Mohammed Yusuf China zin hawin India hmarchhak state 7-te India nen an inzawmna awm chhun, Siliguri-a km 20 bawr vel lek khu India leh hmarchhak state-te inzawmna awmchhun a ni. Tuipuia inkalpawhna dang hmarchhak state te'n nei lo tiin China leh Bangladesh tangkawpin hma lak an tum thu a sawi niin a tarlang a. He thu hian India sorkar a kai harh a. Akyab chhun tura tih Kaladan Multi-modal kawngpui pawimawhna a lo lang ta chiaah a ni, a ti.

He lam kawngpui hi a tlang thuai a ngai ta tih India sorkar hian a hrechiang ta hle ni a sawiin, Zoram leh KMTTP road hi hmarchhak leh India ram lakah a pawimawh ta em em a ni, a ti a. He thilah hian MNF bawk a pawimawh tih India hian a hria niin a sawi bawk.

MNF President chuan, Kaladan Multi-modal Road a hlawhtlin thuai theih nan theih tawp chhuah a tum thu a sawi a ni.

<><><>

SECURITY

India leh Pakistan inkar boruak a chhiat avang leh boruak inlumlet zelah Bangladesh ramri lamah venhimna khauh zawka kalpui a ni.

Police hotute hnen atanga thu dawn danin tun hnai khan Mizoram Police hotute leh he ta paramilitary force, central armed police force (CAPF) leh intelligence pawl aiawhte chu Aizawlah an inhmukhawm a. Kilometre 318 a thui

Mizoram leh Bangladesh ram inrina vengtu Border Security Force (BSF)-te chu ramri ven kawngah uluk leh khauh leh zuala thawk tura hriattir an ni. Pakistan hian Bangladesh a firfiak pawlte hmang tangkai-in India ram tihbuaia tum ni a thudawn a nih avangin Bangladesh ramri-ah hian venhimna khauh zawka kalpui ni se tih a ni a, chutiang a hmala tur chuan BSF te hrilh an ni. Hemi hma hian intelligence pawlte leh venghimtu sipaite chu Bangladesh nena ramri-a venhimna ngawrh zawka kalpui tura hriattir an lo ni tawh a. Meghalaya sorkar phei chuan ramri hrulah hian zan curfew a puang mek a. Pakistan enthlatu pawl ISI mite leh Pakistan sipai officer engemawzat Bangladesh a tirhluk an nih avang leh Bangladesh sorkar hawiher enin venhimna hi khauh zawka kalpui a ni.

Nikum August thla a Bangladesh Prime Minister Sheikh Hasina paihthlak a nih hnu a sorkar lailawk dintu Mohammad Yunus sorkara dinhmun pawimawh tak chelhtu sipai officer bang Maj. Gen. ALM Fazlur Rahman chuan India in Pakistan a beih chuan China nen tangrualin India hmarchhak chu awp tura beih a nih tur thu a lo sawi chhuak tawh bawk a ni.

<><><>

MUHCS

April ni 1 atanga tan Mizoram Universal Health Care Scheme (MUHCS) hnuai-ah damlote a thlawna an inenkawlina atan cheng vaibelchhe 2 leh nuai 59 chuang sorkarin a pechhuak tawh.

April thla chhung bakah May ni 5 khan a vawi lina atan sorkarin cheng vaibelchhe 1, nuai 49, sing 9, sang 8 leh 238 a pe chhuak leh a. Cashless hmanga MUHCS kalpui mekah hian damlo 2,943 hnenah an inenkawlina senso hi damdawi-in 48 hnenah pek chhuah a ni tawh a. Damdawi-in 48 zinga 2 tih loh chu sorkar damdawi-in vek a ni a. Zoram Medical College & Hospital hnenah damlo enkawlina senso pek chhuah tam ber a ni a, Zemabawk a Mizoram State Cancer Institute-in dawtin pathumna chu Aizawl Civil hospital a ni. Khaw hrang hranga sorkar enkawl District hospital bakah, Community Health Centre leh Primary Health Centre atang pawhin mi thahnem tak hnenah pek chhuah tawh a ni a.

Damlo enkawlina senso bill endik tawh la pekchhuah loh hi cheng vaibelchhe 4 leh nuai 11 a la awm mek a. La endik mek dilna lut bill la chinfel loh 490 a awm bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MOTHER’S DAY

May thla Pathianni vawi 2-naa hman thin Nute hriatrengna leh chawimawina hun atana buatsaih ‘Nute Ni’ (Mothers’ Day) chu vawiin khan khawvel hmun dangte rualin Mizoramah pawh Chhandamna Sipai Pawl chuan he ni pual hian hun an hmang.

Mizorama Chhandamna Sipai Pawl Biakin tinah chawmhma dar 10 atang khan Thianghlimna Inkhawm buatsaih a ni a. He inkhawmah hian thuchah ngaihthlak a ni a, lawmthu sawina hun atana hman a nih bakah kum 2024-2025 inkara Nu mual liam tate s̄unna hun hman a ni a. Nute hnena Pangpar hlanna hun buatsaih a ni bawk a ni. Chhandamna Sipai Pawl hian 'Nute Ni' pual hian zanin inkhawm thleng hun an hmang dawn a ni.

Kum 1920 khan Salvation Army rorelna sang International Management Council chuan an Kohhran tan 'Nute Ni' chu High Day-ah puangin thupek a tichhuak a. India ramah pawh kum kum 1920 atang khan 'Nute Ni' hi hman tan a lo ni ta a ni.

'Nute Ni' hi kum 1914 May ni 8 khan USA President Pu Woodrow Wilson-a chuan hemi ni hi Nute Ni Puala ram puma hman a nih tur thu leh sawrkar buildingah te an ram puanzar tar turin thupek a chhuah a. Kumtin May thla Pathianni vawi-2na chu Nute Ni atan nemngheh a lo ni ta a, khawvel ram dangte pawhin May thla Pathianni vawi-2na chu Nute Ni atan hian an hmang ve ta a ni.



MASS PRAYER

Vawiin khan Sawrkar Laipui in ngenna angin Mizorama Sakhaw hrang hrang vuan tute chuan India leh Pakistan inkara buaina a rehna atan leh India Sipai huaisen Operation Sindoor a tel leh indona hmuna awm mek te pualin tawngtairualna hun an hmang.

Kristiante chuan Kohhran hruaitute ruahmanna leh kaihruaina in nizan lamah te leh vawiin lamah te Biakinah tawngtai rual an buatsaih a. Sakhaw dang betu Hindu leh Muslim te pawhin an sakhaw biakbukah te tawngtaina hun an hmang bawk a ni.



PM HOLDS HIGH LEVEL MEETING

Prime Minister Narendra Modi-a hovin vawiin khan New Delhi-a a chenna in-ah mipawimawhte an thukhawm a, he thutkhawmah hian Defence Minister Rajnath Singh, External Affairs Minister Dr S Jaishankar, National Security Advisor Ajit Doval, Chief of Defence Staff, General Anil Chauhan, Army Chief General Upendra Dwivedi, Navy Chief Admiral Dinesh K Tripathi-a leh Air Force Chief Air Chief Marshal Amar Preet Singh-a te an tel a ni.

Puan tawh angin, India leh Pakistan Director General of Military Operations (DGMO)-te inbiakna neih hnuah inkahhai puan a ni a, DGMO-te hi naktuka inbe leh tura ruahman a ni.

Foreign Secy, Vikram Mistri-a chuan Pakistan-in inkahhai thuthlung a bawhchhia chu India-in a ngai thutak hle tih nizan khan New Delhi-a thuthar

lakhawmtute a kawmnaah a sawi a, India sipaite chu inralring renga an awm thu leh International Border leh Line of Control pela chetna a thleng anih chuan na taka chhang let tura hriattir an nih thu a sawi bawk.

<><><>

NATIONAL TECHNOLOGY DAY

Vawiin khan National Technology Day hman a ni a, kum 1998 vawiin angah khan Rajasthan-a Pokhran-ah India-in nuclear bomb, hlawhtling takin a enchhin a ni. He ni hi technology lama India ram tana thawh hlawk, scientist, engineer leh mithiam dangte hriatrengna atan hman a ni a, India mithiamte aircraft siamchhuah hmasak ber, Hansa-3 hlawhtlinna hriarengna ni atan hman a ni bawk.

He ni pual hian Prime Minister Narendra Modi-a leh Defence Minister Rajnath Singh-a ten technology lama ramchhung dinhmun chawikangtu scientist, engineer leh technician-te hnenah zahna chibai a hlan a ni.

<><><>

ARM WRESTLING

New Delhi-a Asia Arm Wrestling Championship 2025, May Ni 3 atanga ni 10 chhunga khelhah Reuben Lalmangaihzuala, a pa Pu LH Zothanpuia College veng Lunglei chu 60 kg Junior-ah Gold Medal la-in Asia Arm Wrestling Champion a ni ta a.

Mizo zinga Asia Arm Wrestling Championship a Gold Medalist hmasa ber a ni a. He ban elh intihsiakna-ah hian Mizoram atangin Reymond-a Chaltlang Lily Veng Aizawl nen kalin Raymond-a hian Kg 70-ah Bronze medal a la thung a ni.

(Thangmingliana Renthlei, PTC Lunglei)

<><><>